

USIM, OIC kongsi perisian pintar

Bandar Baru Nilai: Universiti Sains Islam Malaysia (USIM) menerajui usaha perkongsian pintar pengajian Islam peringkat antarabangsa, terutama rantau Asia Tenggara dan Pertubuhan Kerjasama Islam (OIC).

Usaha itu dilaksanakan melalui penubuhan Konsortium Institusi Pengajian Tinggi (IPT) Islam bagi Kualiti Akademik dan Penyelidikan Lanjutan atau i-IQRA yang menjadi medium percambahan idea dalam kalangan institusi menawarkan program akademik dalam pengajian Islam.

i-IQRA beri manfaat besar

Ketua Setiausaha II, Kementerian Pendidikan, Prof Datuk Seri Dr Zaini Ujang, berkata penubuhan i-IQRA memberi manfaat besar terhadap kemajuan pengajian Islam semua IPT tempatan, selain lebih 240 IPT di negara OIC.

“Penubuhan konsortium itu akan menjadi platform memperkasakan perkongsian pintar dalam aktiviti penyelidikan berkonsepkan 'kelas global' dalam kalangan IPT serantau dan negara OIC.

“Malah, i-IQRA dapat digerakkan untuk mengaktifkan aktiviti bersama rakan strategik luar yang kebanyakan bertumpu di negara ASEAN, Asia Tengah dan Asia Barat,” katanya dalam ucapan dibacakan Ketua Pengarah Jabatan Pengajian Tinggi, Prof Datuk Dr Morshidi Sirat pada majlis perasmian i-IQRA di USIM di sini, semalam.

Zaini berkata, konsortium itu juga mampu menjadikan Malaysia sebagai antara hab pengajian tinggi Islam terunggul di dunia.